



O CONFUEGO

Prezentaçion do Piero Bordo

Bon giorno a tutti. Ben vegnûi a-o Confeugo. Gh'è 'n freido da loî, da orpi e da orsci, ma "Pe Zena senpre ritorna in mâvegiôzo giorno".

A çeimônia do Confeugo a l'è 'na tradiçion antiga. Sospéiza pe 'n pö de tempo, a l'è stæta repigiâ do 1923 quande 'na brancâ de zeneixi a l'à fondou A Compagna.

"A Compagna a l'è l'asociaçion di zeneixi amanti de Zena e da sò tæra, giôxi de antighe glòrie, de belesse, de tradiçoin, da parlâ e di costummi da sò gente, a-o de feua e a-o de d'âto de ogni fede politica e religiosa. A sò lengua ofiçiâle a l'è o Zeneize".

A-a meitæ do seculo pasou – da 'n pö primma a 'n pö doppo a-a goæra – a no l'è stæta celebrâ. S'è recomensou do 1951 e d'aloa a s'è fæta tutti i anni.

Cös'o l'è o Confeugo?

O Confeugo o l'è o saluo de Cappel d'anno do pòpolo

de Zena, da Grande Zena dimmo ancheu.

A chi? Inte 'n primmo tempo a-o Poistæ, ch'o l'ea o cappel primmo do Comun, pö a-i Capitâgni do Pòpolo, quindi a-o Doge e ancheu a-o Scindico.

Sta çeimônia a se fava e a se continua a fâ primma de Natale perché, in tempo, l'anno o comensava o 25 de dexembre.

Chi portâva o saluo di Zeneixi? Inte 'n primmo tempo i Aboei do Pòpolo, i màscimi rappresentanti de træ Podesterie do Bezagno, da Ponçevia e de Ôtri. Doppo, l'Abòu do Bezagno o l'à raprezentou tutti.

Da-o 1923 o l'è o Prescidente d'A Compagna ch'o gh'à o privilegio de portâ o saluo a-o Scindico, no solo a-a voxe, ma anche co-in tronco d'öféuggio coerto de ramme e co-ina ramma agibâ de 'n frexetto gianco e rosso, i colori da bandêa de Zena.

